

Nunatsinni Nakorsaaneqarfik

Angajoqqaanut paasissutissiissut

Qaratsap ameraasaagut aseruuttoorneq tuniluuttoq

Tuniluuttumik qaratsap ameraasaagut aseruuttoortoqarsimavoq.

Nappaat tappiorannartunik bakterissanik meningokokkinik patsiseqarpoq. Nappaat qaratsap ameraasaagut aseruutsitsisarpoq aakkuluunniit toqunartunititsisarluni. Nappaat meeqqani inuusuttunilu nalinginnaaneruvoq, qassinilluunnilli ukiulinni nappaataasinaasarlunissaq.

Tunillatsinneq

Meningokokkit quersornikkut tangajornikkullu silaannakkut serpalinnertigut tuniluuttarput. Tamatigoruinnangajak napparsimassutiginaagu tunillannartumik timiminniittulimmit tunillatsinnikkut napparsimalersoqartarpoq. Taamaammat taama nappaatillit ataasiakkaaginaagajupput ilaatigulli qatanngutit qanigisallu allat tunillanneqarsinnasarput. Bakteerissat timip avataanut pisut ernerlutik toqusarput.

Tunillaasinnaaffik: Nappaatip ersiutaasa takkutinningsiarnernanniit nakorsartinnerup aallartinneraniit ullup unnuallu ataatsip qaangiunnissaata tungaanut

Nappaammut ersiutit

Tunillatsinnermiit napparsimalernissap tungaanut sivisussusaa: Ullut 1-4.

Nappaatip bakterissanik meningokokkinik patsiseqartup nalunaaquttap akunnialunnguusa ingerlanerini inuunermut navianartorsiutaasinnaanerata ilisimanissaa pingaaruteqarpoq. Ullulli marlussuit ingerlaneranni peruluutaalersinnaanera nalinginnaaneruvoq.

Aallaqaammut nappaat nualluummut eqqaanarsinnaavoq. Ullut unnuallu ataatsimiit marluk ingerlanerini kissarneq 38-imiit 40° C-imut annertunermulluunniit qaffassinnaasarpoq.

Kissarululeriataarneq uulinnermik noqarnermilluunniit nassataqarsinnaavoq. Sakkortuumik niaqorluutaagajuttarpoq, meriarnermik nererusunnanilu imerusunnginnermik ilaqartarluni. Napparsimasoq puungalersarpoq eqqissiveerulluni anniarluni puffaqqajaalluni immaqalu ikiarsilluni.

Nappaat bakterissanik meningokokkinik patsiseqartoq, toorneeqqanik aappalaartunik aappalullutilluunniit tungujorujuttunik ammikkut aammik sitsersoqalersinnaaneranut (pettechier) ersiuteqartarpoq. Ilaanni sikinniarnermut ajornakusoortitsisumik annernartumillu tunusuk qiterarlu qerattarsinnaasarput.

Naalungiarsunnili nappaatip ersiutai allaassuteqangaatsiarsinnaasarput. Meeqqat sorusussuseqannginnerusinnaapput, nererusunnatik imerusunnatillu, attortilaarnermi qissasertarlutik, nukillaariartorlutik meriartarlutillu.

Nakorsartinneq

Meeraq nakorsarniarlugu piaarnerpaamik napparsimavimmut unitsinneqassaaq. Meningokokkinik patsiseqartumik nappaateqarneq antibiotikanik nakorsarneqartarpoq.

Nunatsinni Nakorsaaneqarfik

Taama nappaateqartoqartillugu maleruagassat

Meningokok-imik patsiseqartumik nappaateqartoqarnerani iliuseqarnissaq Nunatsinni Nakorsaaneqarfiup akisussaaffigaa.

Qanimut attavigisartakkat arlaannik meningokok-imik patsiseqartumik napparsimasoqarsimappat, nappaammut ersiuteqarneranik malussarniarnissaq iliussissat pingaarnersaraat, taamaattoqassappallu peqqinnissaqarfik ingerlaannaq attavigineqassaaq. Inoqutigii ilaat meningokok-imik patsiseqartumik nappaateqalerpat, qaqutiguugaluq piffissap qaninnerup iluani alla napparsinnaasarpoq.

Meningokok-imik patsiseqartumik nappaatillip illoqatai nappatsaaliniarlugit antibiotikamik nakorsarneqarnissaat innersuussutaasarpoq.

Nappaatillit ilaat ikinnerit saniatigut akiuussutissinneqarsinnaasarput.

Akiuussutissinneqareernerup kingorna ullut tallimat arfinillilluunniit qaangiunnerini ukuni marlunni nappaammut illersuutissaqalersarpoq.

Ulluunerani paaqqinnittarfinni atuarfinilu tunillatsissinnaaneq annikeqimmat, qaqutiguinnaq nappatsaaliiniarluni nakorsaasoqarnissaa innersuussutaasarpoq

Nappaat nerisassat atortulluunniit aqqutigalugit tunillaanneq ajorpoq. Immikkut ittumik pinngussanik saliinissamut ininilluunniit eqqiaanissamut pissutissaqanngilaq.

Qaratsap ameraasaagut aseruuttoornerit allat

Bakteerissat meningokok-it qaratsap ameraasaagut aseruuttoornermut patsisaagajunnersaapput. Qaratsalli ameraasaagut aseruuttoornerit allanik patsiseqarsinnaasarput.

Qaratsap ameraasaagut aeruuttoornerit navianaateqarnerit bakteerissanik patsiseqarput piaarnerpaamillu nakorsagassaallutik.

Meeqqanik akiuussutissiisarneq pillugu maleruagassani Hib- imut kiisalu pneumokok-inut akiuussutissat, bakteerissamik *Hæmophilus influenzae* type b-mik patsiseqartunut bakteerissanullu pneumokok-inut nalinginnaanerusunut illersuutaapput.

Qaratsap ameraasaagut aseruuttoornerit ilaat tappiorannartunik virus-inik patsiseqarput (ass. virus savarnermik nappaateqalersitsisartoq). Nappaatit taamaattut atupiloorneqarsinnaasarput nalinginnaasumilli ulorianaateqaratik. Nakorsarneqarnissaat pisariaqanngilaq napparsimavimmili uninngassutaasarput.

Meeqquerivimmukaqqinnissaq

Nakorsartinneq naammassippat meerarlu peqqissippat.

Meeqqat inersimasullu nappatsaaliniarlugit nakorsartinnerat naammassippat, meeqqerivimmut atuarfimmulluunniit utersinnaapput.